

摘藻堂四庫全書薈要

史部

欽定四庫全書薈要卷六千七百十六 史部

明史卷一百二十三

大學士張廷玉等奉 勅修

列傳第十一

陳友諒

張士誠

方國珍

明玉珍

陳友諒沔陽漁家子也本謝氏祖贅於陳因從其姓少讀書畧通文義有術者相其先世墓地曰法當貴友諒

心竊喜嘗為縣小吏非其好也徐壽輝兵起友諒往從之依其將倪文俊為簿掾壽輝羅田人又名真一業販布元末盜起袁州僧彭瑩玉以妖術與麻城鄒普勝聚眾為亂用紅巾為號奇壽輝狀貌遂推為主至正十一年九月陷蘄水及黃州路販元威順王庫沁布哈遂即蘄水為都稱皇帝國號天完建元治平以普勝為太師未幾陷饒信明年分兵四出連陷湖廣江西諸郡縣遂破昱嶺關陷杭州別將趙普勝等陷太平諸路勢大振

然無遠志所得不能守明年為元師所破壽輝走免已而復熾遷都漢陽為其丞相倪文俊所制十七年九月文俊謀弒壽輝不克奔黃州時友諒隸文俊麾下數有功為領兵元帥遂乘釁殺文俊并其兵自稱宣慰司尋稱平章政事明年陷安慶又破龍興瑞州分兵取邵武吉安而自以兵入撫州已又破建昌贛汀信衢當是時江以南惟友諒兵最強太祖之取太平也與為鄰友諒陷元池州太祖遣常遇春擊取之由是數相攻擊趙普

勝者故驍將號雙刀趙初與俞通海等屯巢湖同歸太祖叛去歸壽輝至是為友諒守安慶數引兵爭池州太平往來掠境上太祖患之嗚普勝客使潛入友諒軍間普勝普勝不之覺見友諒使者輒訴功悻悻有德色友諒銜之疑其貳於己以會師為名自江州猝至普勝以燒羊逆於雁汊甫登舟友諒即殺普勝并其軍乃以輕兵襲池州為徐達等擊敗師盡覆始友諒破龍興壽輝欲徙都之友諒不可未幾壽輝遽發漢陽次江州江州

友諒治所也伏兵郭外迎壽輝入即閉城門悉殺其所部即江州為都奉壽輝以居而自稱漢王置王府官屬遂挾壽輝東下攻太平太平城堅不可拔乃引巨舟薄城西南士卒緣舟尾攀堞而登遂克之志益驕進駐采石磯遣部將陽白事壽輝前戒壯士挾鐵搥擊碎其首壽輝既死以采石五通廟為行殿即皇帝位國號漢改元大義太師鄒普勝以下皆仍故官會大風雨羣臣班沙岸稱賀不能成禮友諒性雄猜好以權術馭下既僭

號盡有江西湖廣之地恃其兵強欲東取應天太祖患友諒與張士誠合乃設計令其故人康茂才為書誘之令速來友諒果引舟師東下至江東橋呼茂才不應始知為所紿戰於龍灣大敗潮落舟膠死者無算亡戰艦數百輕舸走張德勝追敗之慈湖焚其舟馮國勝以其五翼軍感之友諒出皂旗軍迎之又大敗遂棄太平走江州太祖兵乘勝取安慶其將于光歐普祥皆降明年友諒遣兵復陷安慶太祖自將伐之復安慶長驅至江

州友諒戰敗夜挈妻子奔武昌其將吳宏以饒降王溥  
以建昌降胡廷瑞以龍興降友諒忿疆土日蹙乃大治  
樓船數百艘皆高數丈飾以丹漆每船三重置走馬棚  
上下人語聲不相聞艙箱皆裹以鐵載家屬百官盡銳  
攻南昌飛梯衝車百道並進太祖從子文正及鄧愈堅  
守三月不能下太祖自將救之友諒聞太祖至撤圍東  
出鄱陽湖遇於康郎山友諒集巨艦連鎖為陣太祖兵  
不能仰攻連戰三日樂殆已東北風起乃縱火焚友諒



舟其弟友仁等皆燒死友仁號五王眇一目有勇畧既死友諒氣沮是戰也太祖舟雖小然輕駛友諒軍俱勝腫巨艦不利進退以是敗太祖所乘舟檣白友諒約軍士明日併力攻白檣舟太祖知之令舟檣盡白翌日復戰自辰至午友諒軍大敗友諒欲退保鞬山太祖已先扼湖口邀其歸路持數日友諒謀於衆右金吾將軍曰出湖難宜焚舟登陸直趨湖南圖再舉左金吾將軍曰此示弱也彼以步騎躡我進退失所據大事去矣友諒

不能決既而曰右金吾言是也左金吾以言不用舉所部來降右金吾知之亦降友諒蓋困太祖凡再移友諒書其畧曰吾欲與公約從各安一方以俟天命公失計肆毒於我我輕師聞出奄有公龍興十一郡猶不自悔禍復搆兵端一困於洪都再敗於康郎骨肉將士重罹塗炭公即倖生還亦宜却帝號坐待真主不則喪家滅姓悔晚矣友諒得書忿恚不報久之乏食突圍出湖口諸將自上流邀擊之大戰涇江口漢軍且鬪且走日暮

猶不解友諒從舟中引首出有所指搗騾中流矢貫睛  
及顛死軍大潰太子善兒被執太尉張定邊夜挾友諒  
次子理載其屍遁還武昌友諒豪侈嘗造鏤金沐甚工  
宮中器物類是既亡江西行省以沐進太祖歎曰此與  
孟昶七寶溺器何異命有司毀之友諒僭號凡四年子  
理既還武昌嗣偽位改元德壽是冬太祖親征武昌明  
年二月再親征其丞相張必先自岳州來援次洪山常  
遇春擊禽之徇於城下必先驍將也軍中號潑張倚為

重及被禽城中大懼由是欲降者衆太祖乃遣其故臣  
羅復仁入城招理理遂降入軍門俯伏不敢視太祖見  
理幼弱掖之起握其手曰吾不汝罪也府庫財物恣理  
取旋應天授爵歸德侯友諒之從徐壽輝也其父普才  
止之不聽及貴往迎之普才曰汝違吾命吾不知死所  
矣普才五子長友富次友直又次友諒又次友仁友貴  
友仁友貴前死鄱陽太祖平武昌封普才承恩侯友富  
歸仁伯友直懷恩伯贈友仁康山王命所司立廟祀之

以友貴祔理居京師邑邑出怨望語帝曰此童孺小過耳恐細人蠱惑不克全朕恩宜處之遠方洪武五年理及歸義侯明昇並徙高麗遣元降臣樞密使雅克達爾護行賜高麗王羅綺俾善視之亦徙普才等滌陽熊天瑞者本荊州樂工從徐壽輝抄畧江湘間後受陳友諒命攻陷臨江吉安又陷贛州友諒俾以叅知政事守贛兼統吉安南安南雄韶州諸路久之陽言東下署其幟曰無敵自稱金紫光祿大夫司徒平章軍國重事友諒

不能制陰圖取廣東造戰艦於南雄帥數萬衆趨廣州  
元將何真以兵迎於胥江會天大雷雨震其艦檣折天  
瑞懼而還太祖兵克臨江遣常遇春等攻贛天瑞拒守  
五越月至正二十五年正月帥其養子元震肉袒詣軍  
門降太祖宥之授指揮使明年從攻浙西叛降張士誠  
教士誠飛礮擊外軍城中木石俱盡外軍多傷者士誠  
滅天瑞伏誅有周時中者龍泉人嘗為壽輝平章後帥  
所部降策天瑞必叛後果如其言時中累官吏部尚書

出為鎮江知府歷福建鹽運副使元震本姓田氏善戰  
有名遇春之圍贛也元震竊出覘兵遇春亦引數騎出  
猝與遇元震不知為遇春也過之及遇春還始覺遂單  
騎前襲遇春遇春遣從騎揮刀擊之元震奮鐵搥且鬪  
且走遇春曰壯男子也舍之由是喜其才勇既從天瑞  
降薦以為指揮使天瑞誅復故姓云

張士誠小字九四泰州白駒場亭人有弟三人並以操  
舟運鹽為業緣私作姦利頗輕財好施得羣輩心常嚮

鹽諸富家富家多陵侮之或負其直不酬而弓手邱義

尤寃辱士誠甚士誠忿即帥諸弟及壯士李伯昇等十

八人殺義并滅諸富家縱火焚其居人旁郡場招少年

起兵鹽丁方苦重役遂共推為主陷秦州高郵守李齊

諭降之復叛殺行省叅政趙璉并陷興化結若德勝湖

有衆萬餘元以萬戶告身招之不受紹殺李齊襲據高

郵自稱誠王僭號大周建元天祐時至正十三年也明

年元右丞相托克托總大軍出討數敗士誠圍高郵黎



其外城且下順帝信讒解托克托兵柄削官爵以他將代之士誠乘間奮擊元兵潰去由是復振踰年淮東饑士誠乃遣弟士德由通州渡江入常熟十六年二月陷平江并陷湖州松江及常州諸路改平江為隆平府士誠自高郵來都之即承天寺為府第踞坐大殿中射三矢於棟以識是歲太祖亦下集慶遣楊憲通好於士誠其書曰昔隗囂稱雄於天水今足下亦擅號於姑蘇事勢相等吾深為足下喜睦鄰守境古人所貴竊甚慕焉

自今信使往來毋感讒言以生邊釁士誠得書留憲不報已遣舟師攻鎮江徐達敗之於龍潭太祖遣達及湯和攻常州士誠兵來援大敗失張湯二將乃以書求和請歲輸粟二十萬石黃金五百兩白金三百觔太祖答書責其歸楊憲歲輸五十萬石士誠復不報初士誠得平江即攻嘉興元守將苗帥楊諤勒指依數敗之乃遣士德閒道破杭州諤勒指依還救復敗歸明年耿炳文取長興徐達取常州吳良等取江陰士誠兵不得四出

勢漸蹙亡何徐達兵徇宜興攻常熟士德迎戰敗為前鋒趙德勝所擒士德小字九六善戰有謀能得士心浙西地皆其所畧定既被擒士誠大沮太祖欲留士德以招士誠士德間道貽士誠書俾降元士誠遂決計請降江浙右丞相達什特穆邇為言於朝授士誠太尉官其將吏士德在金陵竟不食死士誠雖去偽號擅甲兵土地如故達什特穆邇在杭與楊諤勒括依有隙陰召士誠兵士誠遣史文炳襲殺諤勒括依遂有杭州順帝遣

使徵糧賜之龍衣御酒士誠自海道輸糧十一萬石於  
大都歲以為常既而令其下頌功德邀王爵不許二十  
三年九月士誠復自立為吳王尊其母曹氏為王太妃  
置官屬別治府第於城中以士信為浙江行省左丞相  
幽達什特穆邇於嘉興元徵糧不復與參軍俞思齊者  
字中孚秦州人諫士誠曰向為賊可無貢今為臣不貢  
可乎士誠怒抵案仆地思齊即引疾去當是時士誠所  
據南抵紹興北踰徐州於濟寧之金溝西距於汝潁濠

泗東薄海二千餘里帶甲數十萬以士信及女夫潘元  
紹為腹心左丞徐義李伯昇呂珍為爪牙參軍黃敬夫  
蔡彥文葉德新主謀議元學士陳基右丞饒介典文章  
又好招延賓客所贈遺與馬居室什器甚具諸僑寓貧  
無籍者爭趨之士誠為人外遲重寡言似有器量而實  
無遠圖既據有吳中吳承平久戶口殷盛士誠漸奢縱  
怠於政事士信元紹尤好聚斂金玉珍寶及古法書名  
畫無不充物日夜歌舞自娛將帥亦偃蹇不用命每有

攻戰輒稱疾逃官爵田宅然後起甫至軍所載婢妾樂器踵相接不絕或大會遊談之士擄獲蹴踘皆不以軍務為意及喪師失地還士誠概置不問已復用為將上下嬉娛以至於亡太祖與士誠接境士誠數以兵攻常州江陰建德長興諸全輒不利去而太祖遣邵榮攻湖州胡大海攻紹興常遇春攻杭州亦皆不能下康永安被執謝再興叛降士誠會太祖與陳友諒相持未暇及也友諒亦遣使約士誠夾攻太祖而士誠欲守境觀變

許使者卒不行太祖既平武昌師還即命徐達等規取淮東克泰州通州圍高郵士誠以舟師溯江來援太祖自將擊走之達等遂拔高郵取淮安悉定淮北地於是移檄平江數士誠八罪徐達常遇春帥兵自太湖趨湖州吳人迎戰於毗山又戰於七里橋皆敗遂圍湖州士誠遣朱暹五太子等以六萬衆來援屯於舊館築五砦自固達遇春築十壘以遮之斷其糧道士誠知事急親督兵來戰敗於皂林其將徐志堅敗於東遷潘元紹敗

於烏鎮昇山水陸寨皆破舊館援絕五太子朱暹呂珍  
皆降五太子者士誠養子短小精悍能平地躍丈餘又  
善沒水珍暹皆宿將善戰至是降達等以徇於湖州守  
將李伯昇等以城降嘉興松江相繼降潘原明亦以杭  
州降於李文忠二十六年十一月大軍進攻平江築長  
圍困之士誠距守數月太祖貽書招之曰古之豪傑以  
畏天順民為賢以全身保族為智漢竇融宋錢俶是也  
爾宜三思勿自取夷滅為天下笑士誠不報數突圍決



戰不利李伯昇知士誠困甚遣所善客踰城說士誠曰  
初公所恃者湖州嘉興杭州耳今皆失矣獨守此城恐  
變從中起公雖欲死不可得也莫若順天命遣使金陵  
稱公所以歸義救民之意開城門幅巾待命當不失萬  
戶侯且公之地譬如博者得人之物而復失之於公何  
損士誠仰觀良久曰吾將思之乃謝客竟不降士誠故  
有勇勝軍號十條龍者皆驍猛善鬪每被銀鎧錦衣出  
入陣中至是亦悉敗溺萬里橋下死最後丞相士信中

礮死城中洶洶無固志二十七年九月城破士誠收餘  
衆戰於萬壽寺東街衆散走倉皇歸府第拒戶自縊故  
部將趙世雄解之大將軍達數遣李伯昇潘元紹等諭  
意士誠瞑目不答昇出葑門入舟不復食至金陵竟自  
縊死年四十七命具棺葬之方士誠之被圍也語其妻  
劉曰吾欺且死矣若曹何為劉答曰君無憂妾心不負  
君積薪齋雲樓下城破驅羣妾登樓令養子辰保縱火  
焚之亦自縊有二幼子匿民間不知所終先是黃敬夫

等三人用事吳人知士誠必敗有黃菜葉十七字之謠其後卒驗云莫天祐者元末聚衆保無錫州士誠招之不從以兵攻之亦不克士誠既受元官天祐乃降士誠累表為同僉樞密院事及平江既圍他城皆下惟天祐堅守士誠破胡廷瑞急攻之乃降太祖以其多傷我兵誅之李伯昇仕士誠至司徒既降命仍故官進中書平章同知詹事府事嘗將兵討平湖廣慈利蠻又為征南右副將軍同吳良討靖州蠻後坐胡黨死潘元明以平

章守杭州降仍為行省平章與昇俱歲食祿七百五十石不治事雲南平以元明署布政司事卒官士誠自起至亡凡十四年

方國珍黃巖人長身黑面體白如瓠力逐奔馬世以販鹽浮海為業至正八年有蔡亂頭者行剽海上時有司發兵捕之國珍怨家告其通寇國珍殺怨家遂與兄國璋弟國瑛國珉亡入海聚眾數千人劫運艘梗海道行省叅政多爾濟巴勒討之兵敗被執脅使請於朝授定

海尉尋叛寇温州元以博囉特穆爾為行省左丞督兵  
往討復敗被執乃遣大司農達什特穆爾招之降已而  
汝潁兵起元募舟師守江國珍疑懼復叛誘殺台州路  
達嚕噶齊台哈布哈亡入海使人潛至都賂諸權貴仍  
許降授徽州路治中國珍不聽命陷台州焚蘇之太倉  
元復以海道漕運萬戶招之受官尋進行省叅知政俾  
以兵攻張士誠士誠遣將禦之崑山國珍七戰七捷會  
士誠亦降乃罷兵先是天下承平國珍兄弟始倡亂海

上有司憚於用兵一意招撫惟都事劉基以國珍首逆  
數降數叛不可赦朝議不聽國珍既授官據有慶元溫  
台之地益強不可制國珍之初作亂也元出空名宣敕  
數十道募人擊賊海濱壯士多應募立功所司邀重賄  
不輒與有一家數人死事卒不得官者而國珍之徒一  
再招諭皆至大官由是民慕為盜從國珍者益衆元既  
失江淮資國珍舟以通海運重以官爵羈縻之而無以  
難也有張子善者好縱橫術說國珍以師泝江窺江東

北畧青徐遼海國珍曰吾始志不及此謝之去太祖已  
取婺州使主簿蔡元剛使慶元國珍謀於其下曰江左  
號令嚴明恐不能與抗況為我敵者西有吳南有閩莫  
若姑示順從藉為聲援以觀變衆以為然於是遣使奉  
書進黃金五十觔白金百觔文綺百匹太祖復遣鎮撫  
孫養浩報之國珍請以溫台慶元三郡獻且次子為闕  
為質太祖却其質厚賜而遣之復使博士夏煜往拜國  
珍福建行省平章事弟國瑛叅知政事國珉樞密分院

僉事國珍名獻三郡實陰持兩端煜既至乃詐稱疾自  
言老不任職惟受平章印誥而已太祖察其情以書諭  
曰吾始以汝豪傑識時務故命汝專制一方汝顧中懷  
叵測欲覘我虛實則遣侍子欲却我官爵則稱老病夫  
智者轉敗為功賢者因禍成福汝審圖之是時國珍歲  
歲治海舟為元漕張士誠粟十餘萬石於京師元累進  
國珍官至江浙行省左丞相衢國公分省慶元國珍受  
之如故特以甘言謝太祖絕無內附意及得所諭書竟



不省太祖復以書諭曰福基於至誠禍生於反覆隗囂  
公孫述故轍可鑒大軍一出不可虛辭解也國珍詐窮  
復陽為惶懼謝罪以金寶飾鞍馬獻太祖復却之已而  
苗帥蔣英等叛殺胡大海持首奔國珍國珍不受自台  
州奔福建國璋守台邀擊之為所敗被殺太祖遣使弔  
祭踰年溫人周守道以平陽來降國珍從子明善守溫  
以兵爭叅軍胡深擊敗之遂下瑞安進兵温州國珍恐  
請歲輸白金三萬兩給軍俟杭州下即納土來歸太祖

詔深班師吳元年克杭州國珍據境自如遣間諜假貢  
獻名覘勝負又數通好於庫庫特穆爾及陳友定圖為  
犄角太祖聞之怒貽書數其十二罪復責軍糧二十萬  
石國珍集衆議郎中張仁本左丞劉庸等皆言不可從  
有邱楠者獨爭曰彼所言均非公福也惟智可以決事  
惟信可以守國惟直可以用兵公經營浙東十餘年矣  
遷延猶豫計不早定不可謂智既許之降抑又倍焉不  
可謂信彼之徵師則有詞矣我實負彼不可謂直幸而

扶服請命庶幾可視錢俶乎國珍不聽惟日夜運珍寶  
治舟楫為航海計二十七年九月太祖已破平江命叅  
政朱亮祖攻台州國瑛迎戰敗走進克温州平南將軍  
湯和以大軍長驅抵慶元國珍帥所部遁入海追敗之  
盤嶼其部將相次降和數令人示以順逆國珍乃遣子  
闕奉表乞降曰臣聞天無所不覆地無所不載王者體  
天法地於人無所不容臣荷主上覆載之德舊矣不敢  
自絕於天地故一陳愚衷臣本庸才遭時多故起身海

島非有父兄相藉之力又非有帝制自為之心方主上  
震擊電掣至於婺州臣愚卽遣子入侍固已知主上有  
今日矣將以依日月之末光望雨露之餘潤而主上推  
誠布公俾守鄉郡如故吳越事臣遵奉條約不敢妄生  
節目子姓不戒潛搆釁端猥勞問罪之師私心戰兢用  
是俾守者出迎然而未免浮海何也孝子之於親小杖  
則受大杖則走臣之情事適與此類卽欲面縛待罪闕  
廷復恐嬰斧鉞之誅使天下後世不知臣得罪之深將

謂主上不能容臣豈不累天地大德哉蓋幕下士詹鼎  
詞也太祖覽而憐之賜書曰汝違吾諭不即斂手歸命  
次且海外負恩實多今者窮蹙無聊情詞哀懇吾當以  
汝此誠為誠不以前過為過汝勿自疑遂促國珍入朝  
面讓之曰若來得毋太晚乎國珍頓首謝授廣西行省  
左丞食祿不之官數歲卒於京師子禮官廣洋衛指揮  
僉事闕虎賁衛千戶所鎮撫闕弟行字明敏善詩承旨  
宋濂嘗稱之劉仁本字德元國珍同縣人元末進士乙

科厯官浙江行省郎中與張本仁俱入國珍募數從名  
士趙倣謝理朱右等賦詩有稱於時國珍海運輸元寶  
本仁司其事朱亮祖之下温州也獲本仁太祖數其罪  
鞭背潰爛死餘官屬從國珍降者皆徙滁州獨赦邱楠  
以為韶州知府詹鼎者寧海人有才學為國珍府都事  
判上虞有治聲既至京未見用草封事萬言候駕出獻  
之帝為立馬受讀命丞相官鼎楊憲忌其才沮之憲敗  
除留守司經歷遷刑部郎中坐累死

明玉珍隨州人身長八尺餘目重瞳子徐壽輝起玉珍  
與里中父老圍結千餘人屯青山及壽輝稱帝使人招  
玉珍曰來則共富貴不來舉兵屠之王珍遂降以元帥  
守沔陽與元將哈瑪爾圖戰湖中飛矢中右目遂眇久  
之玉珍帥斗船五十艘掠糧川峽間將引還時元右丞  
諤勒哲圖募兵重慶義兵元帥楊漢應募至欲殺之并  
其軍不克漢走出峽遇玉珍言重慶無重兵諤勒哲圖  
與右丞哈瑪爾圖不協若回船出不意襲之可取而有

也玉珍意未決部將戴壽曰機不可失可分船為二半貯糧歸沔陽半因漢兵攻重慶不濟則掠財物而還玉珍從之襲重慶走諤勒哲圖執哈瑪爾圖獻壽輝壽輝授玉珍隴蜀行省右丞至正十七年也已而諤勒哲圖自果州來會平章埒克達叅政趙資謀復重慶乚嘉定之大佛寺玉珍遣萬勝禦之勝黃陂人有智勇玉珍愛之使從己姓衆呼為明二後乃復姓名勝攻嘉定半年不下玉珍帥衆圍之遣勝以輕兵襲臨成都虜埒克達



及資妻子埒克達妻自沈於江以資妻子徇嘉定招資  
降資引弓射殺妻俄城破執資諤勒括圖埒克達歸於  
重慶館諸治平寺欲使為己用三人執不可乃斬於市  
以禮葬之蜀人謂之三忠於是諸郡縣相次來附二十  
年陳友諒弒徐壽輝自立玉珍曰與友諒俱臣徐氏顧  
悖逆如此命以兵塞瞿塘絕不與通立壽輝廟於城南  
隅歲時致祀自立為隴蜀王以劉楨為參謀楨字維周  
瀘州人元進士嘗為大名路經歷棄官家居玉珍之攻

重慶也道瀘部將劉澤民薦之玉珍往見與語大悅即日延至舟中尊禮備至次年楨屏人說曰西蜀形勝地大王撫而有之休養傷殘用賢治兵可以立不世業不於此時稱大號以係人心一旦將士思鄉土瓦解星散大王孰與建國乎玉珍善之乃謀於衆以二十三年春僭即皇帝位於重慶國號夏建元天統立妻彭氏為皇后子昇為太子倣周制設六卿以劉楨為宗伯分蜀地為八道更置府州縣官名蜀兵視諸國為弱勝兵不滿

萬人玉珍素無遠畧然性節儉頗好學折節下士既即位設國子監教公卿子弟設提舉司教授建社稷宗廟求雅樂開進士科定賦稅以十分取一蜀人悉便安之皆劉楨為之謀也明年遣萬勝由界首鄒興由建昌又指揮李某者由八番分道攻雲南兩路皆不至惟勝兵深入元梁王走營金馬山踰年王挾大理兵擊勝勝以孤軍無繼引還復遣興取巴州久之復更六卿為中書省樞密院改冢宰戴壽司馬萬勝為左右丞相司寇向

大亨司空張文炳知樞密院事司徒鄒興鎮成都吳友  
仁鎮保寧司寇莫仁壽鎮夔關皆平章事是歲遣勝取  
興元使叅政江儼通好於太祖太祖遣都事孫養浩報  
聘遺玉珍書曰足下處西蜀余處江左蓋與漢季孫劉  
相類近者王保保鐵騎勁兵虎踞中原其志殆亦不在  
曹操下使有謀臣如攸或猛將如遼邵余兩人能高枕  
無憂乎予與足下實唇齒邦願以孫劉相吞噬為鑒自  
後信使往返不絕二十六年春玉珍病革召壽等諭曰

西蜀險固協力同心左右嗣子則可以自守不然後事  
非所知也遂卒凡立五年年三十六子昇嗣立改元開  
熙奠玉琮於江水之北號永昌陵廟號太祖尊母彭氏  
為皇太后同聽政昇甫十歲諸大臣皆麤暴不肯相下  
而勝與張文炳有隙勝密遣人殺之文炳所善之玉琮  
養子明昭復矯彭氏旨縊死勝勝於明氏功最多其死  
蜀人多憐之吳友仁自保寧移檄以清君側為名昇命  
戴壽討之友仁遺壽書謂不誅昭則國必不安衆必不

服昭朝誅吾當夕至壽乃奏誅昭友仁入朝謝罪於是  
諸大臣用事而友仁尤專恣國柄旁落遂益不振萬勝  
既死劉楨為右丞相後三年卒是歲昇遣使告哀於太  
祖已又遣使入聘太祖亦遣侍御史蔡摛報之洪武元  
年太祖克元都昇奉書稱賀明年太祖遣使求大木昇  
遂并獻方物帝答以璽書其冬遣平章楊璟諭昇歸命  
昇不從璟復遺昇書曰古之為國者同力度德同德度  
義故能身家兩全流譽無窮反是者輒敗足下幼沖席

先人業據有巴蜀不咨至計而聽羣下之議以瞿塘劍閣之險一夫負戈萬人無如之何此皆不達時變以誤足下之言也昔據蜀最盛者莫如漢昭烈且以諸葛武侯佐之綜核官守訓練士卒財用不足皆取之南詔然猶朝不謀夕僅能自保今足下疆場南不過播州北不過漢中以此準彼相去萬萬而欲藉一隅之地延命頃刻可謂智乎我主上仁聖威武神明響應順附者無不加恩負固者然後致討以足下先人通好之故不忍加

師數使使諭意又以足下年幼未歷事變恐惑於狂瞽  
失遠大計故復遣環面諭禍福深仁厚德所以待明氏  
者不淺足下可不深念乎且向者如陳張之屬竊據吳  
楚造舟塞江河積糧過山岳強將勁兵自謂無敵然鄱  
陽一戰友諒授首旋師東討張氏面縛此非人力實天  
命也足下視此何如友諒子竄歸江夏王師致伐勢窮  
銜璧主上宥其罪愆剖符錫爵恩榮之盛天下所知足  
下無彼之過而能翻然覺悟自求多福則必享茅土之



封保先人之祀世世不絕豈不賢智矣哉若必欲崛強一隅假息頃刻魚遊沸鼎燕巢危幕禍害將至恬不自知環恐天兵一臨凡今為足下謀者他日或各自為身計以取富貴當此之時老母弱子將安所歸福禍利害瞭然可覩在足下審之而已昇終不聽又明年興元守將以城降吳友仁數徃攻之不克是歲太祖遣使假道征雲南昇不奉詔四年正月命征西將軍湯和帥副將軍廉永忠等以舟師由瞿塘趨重慶前將軍傅友德帥

副將軍顧時等以步騎由秦隴趨成都伐蜀初壽言於  
昇曰以王保保李思齊之強猶莫能與明抗況吾蜀乎  
一旦有警計安出友仁曰不然吾蜀襟山帶江非中原  
比莫若外交好而內修備昇以為然遣莫仁壽以鐵索  
橫斷瞿塘峽口至是又遣壽友仁鄒興等益兵為助北  
倚羊角山南倚南城砦鑿兩岸石壁引鐵索為飛橋用  
木板置礮以拒敵和軍至不能進傳友德覘階文無備  
進破之又破綿州壽乃留興等守瞿塘而自與友仁還

會向大亨之師以援漢州數戰皆大敗壽大亨走成都友仁走保寧時永忠亦破瞿塘關飛橋鐵索皆燒斷與中矢死夏兵皆潰遂下夔州師次銅羅峽昇大懼右丞劉仁勸奔成都昇母彭泣曰成都可到亦僅延旦夕命大軍所過勢如破竹不如早降以活民命於是遣使賞表乞降昇面縛銜璧與櫬與母彭及官屬降於軍門和受璧永忠解縛承旨撫慰下令諸將不得有所侵擾而壽大亨亦以成都降於友德昇等悉送京師禮臣奏言

皇帝御奉天殿明昇等俯伏待罪午門外有司宣制赦  
如孟昶降宋故事帝曰昇幼弱事由臣下與孟昶異宜  
免其伏地上表待罪之儀是日授昇爵歸義侯賜第京  
師冬十月和等悉定川蜀諸郡縣執友仁於保寧遂班  
師壽大亨仁壽皆鑿舟自沈死丁世貞者文州守將也  
友德攻文州據險力戰汪興祖死焉文州破遁去已復  
以兵破文州殺朱顯忠友德擊走之夏亡復集餘衆圍  
秦州五十日兵敗夜宿梓潼廟為其下所殺友仁至京

師帝以其寇漢中首造兵端令明氏失國保於市戍他  
將校於徐州明年徙昇於高麗

贊曰友諒士誠起刀筆負貳因亂僭竊恃其富強而卒  
皆敗於其所恃迹其始終成敗之故太祖料之審矣國  
珍首亂反覆無信然竟獲良死玉珍乘勢割據一隅僭  
號二世皆不可謂非幸也國珍又名谷珍蓋降後避明  
諱云

明史卷一百二十三

欽定四庫全書

明史卷一百二十三考證

陳友諒傳徐壽輝起兵至正十一年九月陷蘄水及黃州路敗元威順王遂即蘄水為都稱皇帝

臣章宗

瀛按徐壽輝陷蘄水及黃州路通鑑載在至正十一年五月其稱帝在十月元史順帝紀則陷黃州在九月稱帝在十月蓋分紀與總叙不無互異也謹附考

陳友諒傳至正二十五年

臣章宗瀛按上文叙至正

十一月十七年後書洪武五年此另叙熊天叙事維  
時明祖已自稱吳王所云二十五年乃至正紀年也  
似應標出方合體例且清眉目舊無至正二字謹增  
張士誠傳元以萬戶告身招之不受給殺李齊臣章

宗瀛按薛應旂續通鑑士誠僭帝號在至正十三年  
五月維時李齊先住招降被留已而賊酋自相猜乃  
縱齊歸既而詔赦之賊詭云李齊至乃降行省復強  
之往遂被害所云萬戶告身當即赦也謹識

張士誠傳士誠數以兵攻常州江陰建德長興諸全輒不利云 臣章宗瀛按諸全州元時郡縣無此名明

史地理志載太祖己亥正月改諸暨州為諸全州至丙午年十二月降為縣仍名諸暨考己亥為元至正十九年丙午為二十六年士誠於二十七年被擒則其侵掠正在己亥丙午之間故傳稱諸全也謹附考方國珍傳乃遺大司農達什特穆爾招之降 臣章宗

瀛按元史本傳達什特穆爾於至正八年拜大司農



九年出為湖廣行省其招降方國珍在官行省時此云大司農是尚稱前官也謹仍原文而識之

方國珍傳授廣西行省左丞

臣章宗瀛按舊本作廣

州西行省左丞明時無此官當時廣西行省左丞謹據明實錄刪州字

詹鼎傳除留守司經歷

臣章宗瀛按明史職官志有

留守司掌中都興都防護之事其屬則經歷司經歷  
洪武二年後無所謂留守經歷也舊本無司字謹增

詹鼎傳坐累死

臣章宗瀛按詹鼎之坐累傳未明言

考之明史及洪武實錄亦不載惟朱國禎開國臣傳稱鼎因大都督府除軍吏受賂事發誣其有賊鼎言在留守衛時所養孤甥來省恐有之鼎實不知卒坐誅據此則鼎之賊罪或誣或實皆未可知傳故不詳其事但僅云坐累死究欠分明謹附考而識之

明玉珍傳以二十三年春僭即皇帝位於重慶

臣章

宗瀛按明玉珍稱王在至正二十二年五月其稱帝

在二十三年春正月續通鑑及元史順帝紀皆同此  
以稱王叙於二十年陳友諒弒徐壽輝之後猶屬總  
叙之法至以稱帝屬之二十二年誤矣謹據改



明史卷一百二十三考證



總校官編修臣吳紹深

欽定四庫全書薈要

史部

明史卷二百二十四

五四



詳校官員外郎臣楊世綸

欽定四庫全書薈要卷六千七百十七 史部

明史卷一百二十四

大學士張廷玉等奉 勅修

列傳第十二

庫庫特穆爾 蔡子英

陳友定 巴廷子中等

巴咱爾幹爾密

庫庫特穆爾沈邱人本王姓小字保保元平章察罕特  
穆爾甥也察罕養為子順帝賜名庫庫特穆爾汝穎盜

起中原大亂元師久無功至正十二年察罕起義兵戰

河南北擊賊闕中河東復汴梁走劉福通平山東降田

豐滅賊幾盡既而總大軍圍益都田豐叛察罕為王士

誠所刺事具元史察罕既死順帝即軍中拜庫庫太尉

中書平章政事知樞密院事如察罕官帥兵圍益都穴

地而入克之執豐士誠剖其心以祭察罕縛陳孫頭等

二十餘人獻闕下東取莒州山東地悉定至正二十二

年也初察罕定晉冀博囉特穆爾在大同以兵爭其地

數相攻朝廷下詔和解終不聽庫庫既平齊地引軍還  
駐太原與博囉構難如故會朝臣羅達錫圖沁獲罪於  
太子出奔博囉博囉匿之詔削博囉官解其兵柄博囉  
遂舉兵叛京師殺丞相綽斯戩自為左丞相以羅達錫  
為平章圖沁知樞密院太子求援於庫庫庫庫遣其將  
白索珠以萬騎入衛戰不利奉太子奔太原踰年庫庫  
以太子令舉兵討博囉入大同進薄大都順帝乃襲殺  
博囉於朝庫庫從太子入覲以為太傅左丞相當是時



徵庫庫太子幾殆庫庫功雖高起行間驟至相位中朝  
舊臣多忌之者而庫庫久典軍亦不樂在內居兩月即  
請出治兵南平江淮詔許之封河南王俾總天下兵代  
皇太子出征分省中官屬之半以自隨鹵簿甲仗亘數  
十里軍容甚盛時太祖已滅陳友諒盡有江楚地張士  
誠據淮東浙西庫庫知南軍強未可輕進乃駐軍河南  
檄關中四將軍會師大舉四將軍者李思齊張思道孔  
興圖魯卜也思齊羅山人與察罕同起義兵齒位畧相

瑁得檄大怒曰吾與若父交若髮未燥敢檄我耶令其  
下一甲不得出武關思道等亦皆不聽調庫庫歎曰吾  
奉詔總天下兵而鎮將不受節制何討賊為乃遣其弟  
托音特穆爾以一軍屯濟南防遏南軍而自引兵西入  
關攻思齊等思齊等會兵長安盟於含元殿舊基併力  
拒庫庫相持經年數百戰未能決順帝使使諭令罷兵  
專事江淮庫庫欲遂定思齊等然後引軍東乃遣其驍  
將摩該超河中欲出不意擣鳳翔覆思齊巢穴摩該所

將多博囉部曲行至衛輝軍變脅摩該叛庫庫襲衛輝

彰德據之罪狀庫庫於朝初太子之奔太原也欲用唐

肅宗靈武故事自立庫庫不可及還京師皇后諭指令

以重兵擁太子入城脅順帝禪位庫庫未至京師十里

留其軍以數騎入朝由是太子銜之而順帝亦心忌庫

庫廷臣譁言庫庫受命平江淮乃西攻關中今罷兵不

奉詔跋扈有狀及摩該奏至順帝乃削庫庫太傅中書

左丞相令以河南王就食邑汝南分其軍隸諸將而以

摩該知樞密院事兼平章總河北軍賜其軍號忠義功  
臣太子開撫軍院於京師總制天下兵馬專備庫庫庫  
庫既受詔退軍澤州其部將關保亦歸於朝朝廷知庫  
庫勢孤乃詔李思齊等東出關與摩該合攻庫庫而今  
關保以兵戍太原庫庫憤甚引軍據太原盡殺朝廷所  
置官吏於是順帝下詔盡削庫庫官爵令諸軍四面討  
之是時明兵已下山東收大梁梁王阿掄察罕之父也  
以河東降托音特穆爾敗走餘皆望風降遁無一人抗

者既迫潼關思齊等倉皇解兵西歸而摩該關保皆為

庫庫所擒殺順帝大恐下詔歸罪於太子罷撫軍院悉

復庫庫官令與思齊等分道南討詔下一月明兵已迫

大都順帝北走庫庫入援不及大都遂陷距察罕死時

僅六年云明兵已定元都將軍湯和等自澤州徇山西

庫庫遣將禦之戰於韓店明師大敗會順帝自開平命

庫庫復大都庫庫乃北出雁門將由保安徑居庸以攻

北平徐達常遇春乘虛擣太原庫庫還救部將呼必瑪

勒潛約降明兵因夜劫營營中驚潰庫庫倉卒以十八騎北走明兵遂西入關思齊以臨洮降思道走寧夏其弟良臣以慶陽降既而復叛明兵破誅之於是元臣皆入於明唯庫庫擁兵塞上西北邊苦之洪武三年太祖命大將軍徐達總大兵出西安擣定西庫庫方圍蘭州趨赴之戰於沈兒峪大敗盡亡其衆獨與妻子數人北走至黃河得流木以渡遂奔和林時順帝崩太子嗣位復任以國事五年太祖復遣大將軍徐達左副將軍李

文忠征西將軍馮勝將十五萬衆分道出塞取庫庫大將軍至嶺北與庫庫遇大敗死者數萬人劉基嘗言於太祖曰庫庫未可輕也至是帝思其言謂晉王曰吾用兵未嘗敗北今諸將自請深入敗於和林輕信無謀致多殺士卒不可不戒明年庫庫復攻雁門命諸將嚴為之備自是明兵希出塞矣其後庫庫從其主徙金山卒於哈喇諾海之衙庭其妻毛氏自經死益洪武八年也初察罕破山東江淮震動太祖遣使通好元遣戶部尚

書張昺郎中瑪哈木特浮海如江東授太祖榮祿大夫  
江西等處行中書省平章政事賜以龍衣御酒甫至而  
察罕被刺太祖遂不受殺瑪哈木特以張昺才留官之  
及庫庫視師河南太祖復遣使通好庫庫輒留使者不  
遣凡七致書皆不答既出塞復遣人招諭亦不應最後  
使李思齊往始至則待以禮尋使騎士送歸至塞下辭  
曰主帥有命請公留一物為別思齊曰吾遠來無所齎  
騎士曰願得公一臂思齊知不免遂斷與之還未幾死



太祖以是心敬庫庫一日大會諸將問曰天下奇男子誰也皆對曰常遇春將不過萬人橫行無敵真奇男子太祖笑曰遇春雖人傑吾得而臣之吾不能臣王保保其人奇男子也竟冊其妹為秦王妃張昺仕明累官中書省叅知政事有才辨明習故事裁決如流甚見信任自以故元臣心嘗戀戀會太祖縱降人北還昺附私書訪其子存亡楊憲得書稿以聞下吏按問昺大書牘背曰身在江南心思塞北太祖乃殺之而庫庫幕下士不

屈節縱出塞者有蔡子英子英永寧人元至正中進士  
察罕開府河南辟叅軍事累薦至行省叅政元亡從庫  
庫走定西明兵克定西庫庫軍敗子英單騎走關中亡  
入南山太祖聞其名使人繪形求得之傳詣京師至江  
濱亡去變姓名債舂久之復被獲械過洛陽見湯和長  
揖不拜抑之跪不肯和怒爇火焚其鬚不動其妻適在  
洛請與相見子英避不肯見至京太祖命脫械以禮遇  
之授以官不受退而上書曰陛下乘時應運削平羣雄

薄海內外莫不賓貢臣鼎魚漏網假息南山曩者見獲復得脫亡七年之久重煩有司追跡而陛下以萬乘之尊全匹夫之節不降天誅反療其疾易冠裳賜酒饌授以官爵陛下之量包乎天地矣臣感恩無極非不欲自竭犬馬但名義所存不敢輒渝初志自惟身本韋布智識淺陋過蒙主將知薦仕至七命躍馬食肉十有五年愧無尺寸以報國士之遇及國家破亡又復失節何面目見天下士管子曰禮義廉恥國之四維今陛下創業

垂統正當挈持大經大法垂示子孫臣民奈何欲以無  
禮義寡廉恥之俘囚而廁諸維新之朝賢士大夫之列  
哉臣日夜思維咎往昔之不死至於今日分宜自裁陸  
下待臣以恩禮臣固不敢賣死立名亦不敢偷生苟祿  
若察臣之愚全臣之志禁錮海南畢其餘命則雖死之  
日猶生之年昔王蠲閉戶以自縊李芾闔門以自屠彼  
非惡榮利而樂死亡顧義之所在雖湯鑊有不得避也  
渺焉之軀上愧古人死有餘恨惟陛下裁擇帝覽其書

益重之館之儀曹忽一夜大哭不止人問其故曰無他  
思舊君耳帝知不可奪洪武九年十二月命有司送出  
塞令從故主於和林

陳友定一名有定字安國福清人徙居汀之清流世業  
農為人沈勇喜遊俠鄉里皆畏服至正中汀州府判蔡  
公安至清流募民兵討賊友定應募公安與語奇之使  
掌所募兵署為黃土砦巡檢以討平諸山寨功遷清流  
尹陳友諒遣其將鄧克明等陷汀邵畧杉關行省授友

定汀州路總管禦之戰於黃土大捷走克明踰年克明復取汀州急攻建寧守將旺扎勒特穆爾檄友定入援連破賊悉復所失郡縣行省上其功第一進叅知政事已置分省於延平以友定為平章於是友定盡有福建八郡之地友定以農家子起傭伍目不知書及據八郡數招致文學知名士如閩縣鄭定廬州王翰之屬留置幕下麤涉文史習為五字小詩皆有意理然頗任威福所屬違令者輒承制誅竄不絕漳州守將羅良不平以

書責之曰郡縣者國家之土地官司者人主之臣役而  
詹廩者朝廷之外府也今足下視郡縣如室家驅官僚  
如園僕擅詹廩如私藏名雖報國實有鷹揚跋扈之心  
不知足下欲為郭子儀乎抑為曹孟德乎友定怒竟以  
兵誅良而福清宣慰使陳瑞孫宗安令孔楷建陽人詹  
翰拒友定不從皆被殺於是友定威震八閩然事元未  
嘗失臣節是時張士誠據浙西方國珍據浙東名為附  
元歲漕粟大都輒不至而友定歲輸粟數十萬石海道

遼遠至者嘗十三四順帝嘉之下詔褒美太祖既定婺  
州與友定接境友定侵處州叅政胡深擊走之遂下浦  
城克松溪獲友定將張子玉與朱亮祖進攻建寧破其  
二柵友定遣阮德柔以兵四萬屯錦江繞出深後斷其  
歸路而自帥牙將賴政等以銳師搏戰德柔自後夾擊  
深兵敗被執死太祖既平方國珍即發兵伐友定將軍  
胡廷瑞何文輝由江西趨杉關湯和廖永忠由明州海  
道取福州李文忠由浦城取建寧而別遣使至延平招



諭友定友定置酒大會諸將及賓客殺明使者澀其血  
酒甕中與衆酌飲之酒酣誓於衆曰吾曹並受元厚恩  
有不以死拒者身磔妻子戮遂往視福州環城作壘距  
壘五十步輒築一臺嚴兵為拒守計已而聞杉關破急  
分軍為二以一軍守福而自帥一軍守延平以相犄角  
及湯和等舟師抵福之五虎門平章庫春引兵逆戰敗  
明兵緣南臺蟻附登城守將遁去叅政尹克仁宣政使  
多爾瑪不屈死僉院拜特穆爾積薪樓下殺妻妾及二

女縱火自焚死廷瑞克建寧湯和進攻延平友定欲以  
持久困之諸將請出戰不許數請不已友定疑所部將  
叛殺蕭院判軍士多出降者會軍器局災城中礮聲震  
地明師知有變急攻城友定呼其屬訣曰大事已去吾  
一死報國諸君努力因退入省堂衣冠北面再拜仰藥  
死所部爭開城門納明師師入趨視之猶未絕也昇出  
水東門適天大雷雨友定復甦械送京師入見帝詰之  
友定厲聲曰國破家亡死耳尚何言遂併其子海殺之

海一名宗海工騎射亦喜禮文士友定既被執自將樂歸於軍門至是從死元末所在盜起民間起義兵保障鄉里稱元帥者不可勝數元輒因而官之其後或去為盜或事元不終惟友定父子死義時人稱完節焉友定既死興化泉州皆望風納款獨漳州路達嚕嚕齊德爾密什具公服北面再拜引斧斫印章以佩刀割喉而死時云閩有三忠謂友定拜特穆爾德爾密什也鄭定字孟宣好擊劍為友定記室及敗浮海入交廣間久之還

居長樂洪武末累官至國子助教王翰字用文仕元為

潮州路總管友定敗為黃冠棲永泰山中者十載太祖

聞其賢強起之自刎死有子偁知名為友定所辟者又

有巴延子中其先本西域人後仕於江西因家焉子中

明春秋五舉有司不第行省辟授東湖書院山長遷建

昌教授子中雖儒生慷慨喜談兵江西盜起授分省都

事使守贛州而陳友諒兵已破贛子中倉卒募吏民與

鬥城下不勝脫身閒道走閩陳友諒素知之辟授行省

員外郎出奇計以友定兵復建昌浮海如元都獻捷累

遷吏部侍郎持節發廣東何真兵救閩至則真已降於

廖永忠子中跳墮馬折一足致軍前永忠欲脅降之不

屈永忠義而舍之乃變姓名冠黃冠遊行江湖間太祖

求之不得簿錄其妻子子中竟不出嘗齋鳩自隨久之

事寢解乃還鄉里洪武十二年詔郡縣舉元遣民布政

使沈立本密言子中於朝以幣聘使者至子中太息曰

死晚矣為歌七章哭其祖父師友飲鴆而死當元亡時

守土臣仗節死者甚衆明兵克太平總管靳義赴水死  
攻集慶行臺御史大夫福壽戰敗嬰城固守城破猶督  
兵巷戰坐伏龜樓指揮左右或勸之遁福壽叱而射之  
遂死於兵叅政伯嘉努達嚕噶齊達尼斯達等皆戰死  
克鎮江守將段武平章鼎鼎戰死克寧國百戶張文貴  
殺妻妾自刎死克徽州萬戶吳訥戰敗自殺克婺州浙  
東廉訪使楊惠婺州達嚕噶齊僧珠戰死克衢州總管  
馬浩赴水死舒穆魯伊遜守處州其母與弟和遜先為

明兵所獲令為書招之不聽比克處伊遜敗走建寧收

集士卒欲復處州攻慶元為耿再成所敗還走建寧半

道遇鄉兵被殺部將李彥文葬之龍泉太祖嘉其忠遣

使致祭復其處州生祠又祠福壽於應天余闕於安慶

李黼於江州闕黼事具元史其後大軍北克益都平章

布延布哈不屈死克東昌平章申榮自經死真定路達

嚕噶齊濟農沙章聞明取元都朝服登城西崖北面再

拜投崖死克奉元西臺御史桑噶錫里與妻子俱投崖

死左丞巴勒唐古逃入終南山郎中恩克仰藥死檢校

阿什克布哈自經死三原縣尹朱春謂其妻曰吾當死

以報國妻曰君能盡忠妾不能盡節俱投繯而死又大

軍攻永州右丞鄧祖勝固守食盡力窮仰藥死克梧州

吏部尚書布延特穆爾戰死張翱赴水死克靖江都事

趙元隆陳瑜劉永錫廉訪使僉事特穆爾布哈元帥約

尼圖們萬戶董綽哈府判趙世傑皆自殺至如劉福通

徐壽輝陳友諒等所破郡縣守吏將帥多死者已見元



史不具載載其見明實錄者又有劉謨江西人為仁壽  
教官明玉珍入蜀棄官隱瀘州玉珍欲官之不就鳳山  
趙善璞隱深山明玉珍聘為學士亦不就而張士誠破  
平江時叅軍楊椿挺身戰刀交於胸瞋目怒罵死妻亦  
自經士誠又以書幣徵故左司員外郎楊乘於松江乘  
具酒醴告祖禰顧西日晴明日人生晚節如是足矣夜  
分自經死其親藩死事最烈者有雲南梁王

梁王巴咱爾幹爾密元世祖第五子雲南王和克齊之

裔也封梁王仍鎮雲南順帝之世天下多故雲南僻遠

王撫治有威惠至正二十二年明玉珍僭號於蜀遣兵

三道來攻王走營金馬山明年以大理兵迎戰玉珍兵

敗退久之順帝北去大都不守中國無元尺寸地而王

守雲南自若歲遣使自塞外達元帝行在不少懈洪武

四年明師平四川天下大定太祖以雲南險僻不欲用

兵明年正月北平守將以所得王遣往漠北使者蘇成

來獻太祖命待制王禕齎詔偕成往招諭王待禕以禮

時會元嗣君遣使托克托來徵餉托克托疑王有他意  
因脅以危語王遂殺禕而以禮斂之踰三年太祖復遣  
湖廣參政吳雲偕大軍所獲雲南使臣鐵知院等往知院  
以已奉使被執誘雲改制書給王雲不從被殺王聞雲  
死收其骨送蜀給孤寺太祖知王終不可以諭降乃命傅  
友德為征南將軍藍玉沐英為副帥師征之洪武十四  
年十二月下普定王遣司徒平章達爾瑪率兵駐曲靖  
沐英引軍疾趨乘霧抵白石江霧解達爾瑪望見大驚

友德等率兵進擊達爾瑪兵潰被擒先是王以女妻大理酋段得功嘗倚其兵力後以疑殺之遂失大理援至是達爾瑪敗失精甲十餘萬王知事不可為走普寧州之忽納若焚其龍衣驅其子赴滇池死遂與左丞托迪右丞魯涵夜入草舍俱自經太祖遷其家屬於耽羅贊曰洪武九年方國珍死宋濂奉敕撰墓碑於一時羣雄皆直書其名獨至察罕曰齊國李忠襄王順逆之理昭然可見矣庫庫百戰不屈欲繼先志而齎恨以死友

定不作何真之偷生梁王恥為納克楚之背國要皆元  
之忠臣也詩曰其儀一兮心如結兮易曰苦節悔亡其  
已廷子中蔡子英之謂歟嘗謂元歸塞外一時從臣必  
有賦式微之章於沙漠之表者惜其姓字湮沒不得見  
於人間然則若子英者又豈非厚幸哉

明史卷一百二十四

欽定四庫全書

明史卷一百二十四考證

庫庫特穆爾傳詔削博囉官解其兵柄博囉遂舉兵反

犯京師殺丞相綽斯噶

臣章宗瀛按元史順帝紀

博囉知詔令削奪皆丞相綽斯噶所為因令圖沁舉

兵犯闕朝廷遣兵拒之不勝乃執綽斯噶及宦官布

木布哈與之未嘗云殺也續通鑑所載同綽斯噶本

傳則云為其下所殺是當時亦未殺之也此云博囉

舉兵反蓋重其主謀之罪而殺綽斯戩則從本傳總叙其始末謹附考

庫庫特穆傳廷臣譁言庫庫受命平江淮乃西攻闕中令罷兵不奉詔跋扈有狀及摩該奏至臣章宗瀛

按是時庫庫與思齊等連兵元順帝下詔和解庫庫殺詔使拒命見何喬遠名山藏據此則庫庫不得謂無叛迹摩該之罪狀於朝蓋因此謹附考

庫庫特穆傳於是順帝下詔盡削庫庫官爵臣章宗

瀛接史元順帝紀削庫庫官爵在至正二十七年八月因摩該之奏也至十月復詔統領職事如故二十八年二月又詔李思齊等進討閏七月庫庫擒摩該等使人聞於朝順帝不得已令誅之未幾又復河南王爵至八月而明兵入大都矣是一歲之間再削再復傳叙以為一尚未明晰謹附考

庫庫特穆傳五年太祖復遣大將軍徐達左副將軍李文忠征西將軍馮勝將十五萬衆分道出塞取庫庫



臣章宗瀛按明太祖本紀嶺北之戰在洪武五年正月上文既稱洪武三年則此處當云五年不得以踰年概之轉似四年事也紀時尚未明晰謹據改

陳友定傳太祖既定婺州與友定接境友定侵處州

臣章宗瀛按明太祖定婺州在至正十八年十二月友定之侵處州在二十五年二月見明太祖本紀其間相距八年非同時事傳特統紀之耳謹識

陳友定傳將胡廷瑞何文輝由江西趨杉關

臣

章宗

宗瀛按明太祖本紀至正二十七年十月命胡廷瑞等取福建續通鑑亦同此處作廷美考本傳廷瑞後改名美非廷美也謹據通鑑改

梁王巴咱爾斡爾密傳至正二十二年

臣

章宗瀛按

明玉珍僭號在至正二十三年其攻雲南在二十二年考元順帝以二十八年閏七月北去安得有二十九年之稱舊本作二十九年顯係誤刊謹據元史及續通鑑改

梁王傳歲遣使自塞外達元帝行在不少懈洪武四年

明師平四川 臣章宗瀛按梁王乃元之宗藩有與

國同休戚之義非如唐時藩鎮可以執臣節概之也

今刪舊本執臣節如故五字改作不少懈三字又按

王禕使雲南乃洪武五年事見明太祖實錄舊本既

未列洪武年號於前則下文叙明年王禕齎詔往諭

事殊欠明晰今刪舊本未幾二字改作洪武四年四

字謹識

贊曰梁王恥為訥克楚之背國 臣章宗瀛按納克楚

為明邊患最久傳云背國蓋指其為太平千戶時曾  
降明不若梁王之始終守土也謹識

明史卷一百二十四考證

欽定四庫全書薈要卷六千七百十八 史部

明史卷一百二十五

大學士張廷玉等奉 勅修

列傳第十三

徐 達

常遇春

徐達字天德濠人世業農達少有大志長身高顴剛毅  
武勇太祖之為郭子興部帥也達時年二十二往從之  
一見語合及太祖南略定遠帥二十四人往達首與焉

尋從破元兵於滁州澗從取和州子興授達鎮撫子興  
執孫德崖德崖軍亦執太祖達挺身詣德崖軍請代太  
祖乃得歸達亦獲免從渡江拔采石取太平與常遇春  
皆為軍鋒冠從破禽元將陳額森別將兵取溧陽溧水  
從下集慶太祖身居守而命達為大將帥諸軍東攻鎮  
江拔之號令明肅城中宴然授淮興翼統軍元帥時張  
士誠已據常州挾江東叛將陳保二以舟師攻鎮江達  
敗之於龍潭遂請益兵以圍常州士誠遣將來援達以

敵狡而銳未易力取乃離城設二伏以待別遣將王均  
用為奇兵而自督軍戰敵退走遇伏大敗之獲其張湯  
二將進圍常州明年克之進僉樞密院事繼克寧國徇  
宜興使前鋒趙德勝下常熟擒士誠弟士德明年復攻  
宜興克之太祖自將攻婺州命達留守應天別遣兵襲  
破天完將趙普勝復池州遷奉國上將軍同知樞密院  
事進攻安慶自無為陸行夜掩浮山寨破普勝部將於  
青山遂克潛山還鎮池州與遇春設伏敗陳友諒軍於



九華山下斬首萬人生擒三千人遇春曰此勁旅也不  
殺為後患達不可乃以狀聞而遇春先以夜旣其人過  
半太祖不憚悉縱遣餘衆於是始命達盡護諸將陳友  
諒犯龍江達軍南門外與諸將力戰破之追及之慈湖  
焚其舟明年從伐漢取江州友諒走武昌達追之友諒  
出戰艦沔陽達營漢陽沌口以遏之進中書右丞明年  
太祖定南昌降將祝宗康泰叛達以沌口軍討平之從  
援安豐破吳將呂珍遂圍廬州會漢人寇南昌太祖召

達自廬州來會師過於鄱陽湖友諒軍甚盛達身先諸將力戰敗其前鋒殺千五百人獲一巨舟太祖知敵可破而慮士誠內犯即夜遣達還守應天自帥諸將鏖戰竟斃友諒明年太祖稱吳王以達為左相國復引兵圍廬州克其城略下江陵辰州衡州寶慶諸路湖湘平召還帥遇春等徇淮東克泰州吳人陷宜興達還救復之復引兵渡江克高郵俘吳將士千餘人會遇春攻淮安破吳軍於馬騾港守將梅思祖以城降進破安豐獲元

將錫都走左君弼盡得其運艘元兵侵徐州迎擊大破之俘斬萬計淮南北悉平師還太祖議征吳右相國李善長請緩之達曰張氏汰而苛大將李伯昇輩徒擁子女玉帛易與耳用事者黃蔡葉三叅軍書生不知大計臣奉主上威德以大軍感之三吳可計日定太祖大悅拜達大將軍平章遇春為副將軍帥舟師二十萬人薄湖州敵三道出戰達亦分三軍應之別遣兵扼其歸路敵戰敗返走不得入城還戰大破之擒將吏二百人圍

其城士誠遣呂珍等以兵六萬赴救屯舊館築五寨自  
固達使遇春等為十壘以遮之士誠自以精兵來援大  
破之於皂林士誠走遂拔昇山水陸寨五太子朱暹呂  
珍等皆降以徇於城下湖州降遂下吳江州從太湖進  
圍平江達軍葑門遇春軍虎邱郭子興軍婁門華雲龍  
軍胥門湯和軍閭門王弼軍盤門張溫軍西門康茂才  
軍北門耿炳文軍城東北仇成軍城西南何文輝軍城  
西北築長圍困之架木塔與城中浮屠等別築臺三成

瞰城中置弓弩火筒臺上又置巨礮所擊輒糜碎城中  
大震達遣使請事太祖勅勞之曰將軍謀勇絕倫故能  
遏亂略削羣雄令事必稟命此將軍之忠吾甚嘉之然  
將在外君不御軍中緩急將軍其便宜行之吾不中制  
既而平江破執士誠傳送應天得勝兵二十五萬人城  
之將破也達與遇春約曰師入我營其左公營其右又  
令將士曰掠民財者死毀民居者死離營二十里者死  
既入吳人安堵如故師還封信國公尋拜征虜大將軍

以遇春為副帥步騎二十五萬人北取中原太祖親馮  
於龍江是時稱名將必推達遇春兩人才勇相類皆太  
祖所倚重遇春剽疾敢深入而達尤長於謀略遇春下  
城邑不能無誅僂達所至不擾即獲壯士與謀結以恩  
義俾為己用由此多樂附大將軍者至是太祖諭諸將  
御軍持重有紀律戰勝攻取得為將之體者莫如大將  
軍達又謂達進取方略宜自山東始師行克沂州降守  
將王宣進克嶧州王宣復叛擊斬之莒密海諸州悉下

乃使韓政分兵扼河張興祖取東平濟寧而自帥大軍  
拔益都徇下濰膠諸州縣濟南降分兵取登萊齊地悉  
定洪武元年太祖即帝位以達為右丞相冊立皇太子  
以達兼太子少傅副將軍遇春克東昌會師濟南擊斬  
樂安反者還軍濟寧引舟師泝河趨汴梁守將李克彝  
走左君弼珠占等降遂自虎牢關入洛陽與元將托昔  
特穆爾大戰於洛水北破走之梁王阿掄以河南降略  
定嵩陝陳汝諸州遂擣潼關李思齊奔鳳翔張思道奔

廊城遂入關西至華州捷聞太祖幸汴梁召達詣行在所置酒勞之且謀北伐達曰大軍平齊魯掃河洛王保保逡巡觀望潼關既克思齊輩狼狽西奔元聲援已絕今乘勢直搗元都可不戰有也帝曰善達復進曰元都克而其主北走將窮追之乎帝曰元運衰矣行自漸滅不煩窮兵出塞之後固守封疆防其侵軼可也達頓首受命遂與副將軍會師河陰遣裨將分道徇河北地連下衛輝彭德廣平師次臨清使傅友德開陸道通步騎



顧時浚河通舟師遂引而北遇春已克德州合兵取長  
蘆扼直沽作浮橋以濟師水陸並進大敗元軍於河西  
務進克通州順帝帥后妃太子北去踰日達陳兵齊化  
門填濠登城監國淮王特穆爾布哈左丞相慶通平章  
德爾畢什富森賽音布哈右丞張康伯御史中丞穆辰  
等不降斬之餘不戮一人封府庫籍圖書寶物令指揮  
張勝以兵千人守宮殿門使宦者護視諸宮人妃主禁  
士卒毋所侵暴吏民安居市不易肆捷聞詔以元都為

北平府置六衛留孫興祖等守之而命達與遇春進取山西遇春先下保定中山真定馮勝湯和下懷慶度太行取澤潞達以大軍繼之時庫庫特穆爾方引兵出雁門將由居庸以攻北平達聞之與諸將謀曰庫庫遠出太原必虛北平有孫都督在足以禦之今乘敵不備直擣太原使進不得戰退無所守所謂批亢擣虛者也彼若西還自救此成禽耳諸將皆曰善乃引兵趨太原庫庫至保安果還救達選精兵夜襲其營庫庫以十八騎

遁去盡降其衆遂克太原乘勢收大同分兵徇未下州  
縣山西悉平二年引兵西渡河至鹿臺張思道遁遂克  
奉元時遇春下鳳翔李思齊走臨洮達會諸將議所向  
皆曰張思道之才不如李思齊而慶陽易於臨洮請先  
慶陽達曰不然慶陽城險而兵精猝未易拔也臨洮北  
界河湟西控羌戎得之其人足備戰鬪物產足佐軍儲  
感以大兵思齊不走則束手縛矣臨洮既克於旁郡何  
有遂渡隴克秦州下伏羌寧遠入鞏昌遣右副將軍馮

勝逼臨洮思齊果不戰降分兵克蘭州襲走豫王盡收其部落輜重還出蕭關下平涼思道走寧夏為庫庫所執其弟良臣以慶陽降達遣薛顯受之良臣復叛夜出兵襲傷顯達督軍圍之庫庫遣將來援逆擊敗去遂拔慶陽良臣父子投於井引出斬之盡定陝西地詔達班師賜白金文綺甚厚將論功大封會庫庫攻蘭州殺指揮使副將軍遇春已卒三年春帝復以達為大將軍平章李文忠為副將軍分道出兵達自潼關出西道擣定

西取庫庫文忠自居庸出東道絕大漠追元嗣主達至  
安定庫庫退屯沈兒峪進軍薄之隔溝而壘日數交庫  
庫遣精兵從間道劫東南壘左丞胡德濟倉卒失措軍  
驚擾達帥兵擊却之德濟大海子也達以其功臣子械  
送之京師而斬其下指揮等數人以徇明日整兵奪溝  
殊死戰大破庫庫兵擒郊王濟王及國公平章以下文  
武僚屬千八百六十餘人將士八萬四千五百餘人馬  
駝雜畜以巨萬計庫庫僅挾妻子數人奔和林德濟至

京帝釋之而以書諭達將軍效衛青不斬蘇建耳獨不見穰苴之待莊賈乎將軍誅之則已今下廷議吾且念其信州諸暨功不忍加誅繼自今將軍母事姑息達既破庫庫即帥師自徽州南一百八渡至略陽克沔州入連雲棧攻興元取之而副將軍文忠亦克應昌獲元嫡孫妃主將相先後露布間詔振旅還京師帝迎勞於龍江乃下詔大封功臣授達開國輔運推誠宣力武臣特進光祿大夫左柱國太傅中書右丞相叅軍國事改封

魏國公歲祿五千石予世券明年帥盛熙等赴北平練軍馬修城池徙山後軍民實諸衛府置二百五十四屯墾田一千三百餘頃其冬召還五年復大發兵征庫庫達以征虜大將軍出中道左副將軍李文忠出東道征西將軍馮勝出西道各將五萬騎出塞達遣都督藍玉擊敗庫庫於圖拉河庫庫與賀宗哲合兵力拒達戰不利死者數萬人帝以達功大弗問也時文忠軍亦不利引還獨勝至西涼獲全勝坐匿駝馬賞不行事具文忠

勝傳明年達復帥諸將行邊破敵於塔喇海還軍北平  
留三年而歸十四年復帥湯和等討鼎爾布哈已復還  
鎮每歲春出冬暮召還以為常還輒上將印賜休沐宴  
見歡飲布衣兄弟稱而達愈恭慎帝嘗從容言曰徐兄  
功大未有寧居可賜以舊邸舊邸者太祖為吳王時所  
居也達固辭一日帝與達之邸強飲之醉而蒙之被舁  
卧正寢達醒驚趨下階俯伏呼死罪帝覘之大悅乃命  
有司即舊邸前治甲第表其坊曰大功胡惟庸為丞相



欲結好於達達薄其人不答則賂達閻者福壽使圖達  
福壽發之達亦不問惟時時為帝言惟庸不任相後果  
敗帝益重達十七年太陰犯上將帝心惡之達在北平  
病背疽稍愈帝遣達長子輝祖齋敕往勞尋召還明年  
二月病篤遂卒年五十四帝為輟朝臨喪悲慟不已追  
封中山王謚武寧贈三世皆王爵賜葬鍾山之陰御製  
神道碑文配享太廟肖像功臣廟位皆第一達言簡慮  
精在軍令出不二諸將奉持凜凜而帝前恭謹如不能

言善拊循與下同甘苦士無不感恩效死以故所向克捷尤嚴戢部伍所平大都二省會三郡邑百數間井宴然民不苦兵歸朝之日單車就舍延禮儒生談議終日雍雍如也帝嘗稱之曰受命而出成功而旋不矜不伐婦女無所愛財寶無所取中正無疵昭明乎日月大將軍一人而已子四輝祖添福膺緒增壽長女為文皇帝后次代王妃次安王妃輝祖初名允恭長八尺五寸有才氣以勲衛署左軍都督府事達薨嗣爵以避皇太孫

諱賜名數出練兵陝西北平山東河南元將阿魯特  
穆爾隸燕府有異志捕誅之還領中軍都督府建文初  
加太子太傅燕王子高煦輝祖甥也王將起兵高煦方  
留京師竊其善馬而逃輝祖大驚遣人追之不及乃以  
聞遂見親信久之命帥師援山東敗燕兵於齊眉山燕  
人大懼俄被詔還諸將勢孤遂相次敗績及燕兵渡江  
輝祖猶引兵力戰成祖入京師輝祖獨守父祠弗迎於  
是下吏命供罪狀惟書其父開國勲及券中免死語成

祖大怒削爵幽之私第永樂五年卒萬曆中錄建文忠  
臣廟祀南都以輝祖居首後追贈太師謚忠貞輝祖死  
踰月成祖詔羣臣輝祖與齊黃輩謀危社稷朕念中山  
王有大功曲赦之今輝祖死中山王不可無後遂命輝  
祖長子欽嗣九年欽與成國公勇定國公景昌永昌侯  
忠等俱以縱恣為言官所劾帝宥勇等而令欽歸就學  
十九年來朝遽辭歸帝怒罷為民仁宗即位復故爵傳  
子顯宗承宗承宗天順初守備南京兼領中軍府公廉

恤士有賢聲卒子備嗣備字公輔持重善容止南京守備體最隆懷柔伯施鑒以協同守備位備上備不平言於朝詔以爵為序著為令弘治十二年給事中胡易御史胡獻以災異陳言下獄備上章救之正德中上書諫遊畋語切直嘗與無錫民爭田賄劉瑾為時所議備嗣五十二年而卒贈太傅謚莊靖孫鵬舉嗣嬖其妾冒封夫人欲立其子為嫡坐奪祿傳子邦瑞孫維志曾孫弘基自承宗至弘基六世皆守備南京領軍府事弘基累

加太傅卒謚莊武子文爵嗣明亡爵除增壽以父任仕  
至左都督建文帝疑燕王反嘗以問增壽增壽頓首曰  
燕王先帝同氣富貴已極何故反及燕師起數以京師  
虛實輸於燕帝覺之未及問比燕兵渡江帝召增壽詰  
之不對手劍斬之殿廡下王入撫屍哭即位追封武陽  
侯謚忠愍尋進封定國公祿二千五百石以其子景昌  
嗣驕縱數被劾成祖輒宥之成祖崩景昌坐居喪不出  
宿奪冠服歲祿已而復之三傳至元孫光祚累典軍府

加太師嗣四十五年卒謚榮僖傳子至孫文璧萬厯中  
領後軍府以小心謹畏見親於帝數代郊天加太師累  
上書請建儲罷礦稅釋逮繫嗣三十五年卒謚康忠再  
傳至曾孫允禎崇禎末為流賊所殺洪武諸功臣惟達  
子孫有二公分居兩京魏國之後多賢而累朝恩數定  
國常倍之嘉靖中詔裁恩澤世封有言定國功弗稱者  
竟弗奪也添福早卒膺緒授尚寶司卿累遷中軍都督  
僉事奉朝請世襲指揮使

常遇春字伯仁懷遠人貌竒偉勇力絕人猿臂善射初  
從劉聚為盜察聚終無成歸太祖於和陽未至困卧田  
間夢神人被甲擁盾呼曰起起主君來驚寤而太祖適  
至即迎拜時至正十五年四月也無何自請為前鋒太  
祖曰汝特饑來就食耳吾安得汝留也遇春固請太祖  
曰俟渡江事我未晚也及兵薄牛渚磯元兵陳磯上舟  
距岸且三丈餘莫能登遇春飛舸至太祖麾之前遇春  
應聲奮戈直前敵接其戈乘勢躍而上大呼跳盪元軍



披靡諸將乘之遂拔采石進取太平授總管府先鋒進  
總管都督時將士妻子輜重皆在和州元中丞曼濟哈  
雅復以舟師襲據采石道中梗太祖自將攻之遣遇春  
多張疑兵分敵勢戰既合遇春操輕舸衝哈雅舟為二  
左右縱擊大敗之盡得其舟江路復通尋命守溧陽從  
攻集慶功最從元帥徐達取鎮江進取常州吳兵圍達  
於牛塘遇春往援破解之禽其將進統軍大元帥克常  
州遷中翼大元帥從達攻寧國中流失裏創鬪克之別

取馬駝沙以舟師攻池州下之進行省都督馬步水軍  
大元帥從取婺州轉同僉樞密院事守婺移兵圍衢州  
以奇兵突入南門甕城毀其戰具急攻之遂下得甲士  
萬人進僉樞密院事攻杭州失利召還應天從達拔趙  
普勝之水寨從守池州大破漢兵於九華山下語具達  
傳友諒薄龍灣遇春以五翼軍設伏大破之遂復太平  
功最太祖追友諒於江州命遇春留守用法嚴軍民肅  
然無敢犯進行省參知政事從取安慶漢軍出江游徼

遇春擊之皆反走乘勝取江州還守龍灣援長興俘殺

吳兵五千餘人其將李伯昇解圍遁命覓安慶城先是

太祖所任將帥最著者平章邵榮右丞徐達與遇春為

三而榮尤宿將善戰至是驕蹇有異志與叅政趙繼祖

謀伏兵為變事覺太祖欲宥榮死遇春直前曰人臣以

反名尚何可宥臣義不與共生太祖乃飲榮酒流涕而

戮之以是益愛重遇春池州帥羅友賢據賢山寨通張

士誠遇春破斬之從援安豐比至呂珍已陷其城殺劉

福通聞大軍至盛兵拒守太祖左右軍皆敗遇春橫擊其陣三戰三破之俘獲士馬無算遂從達圍廬州城將下陳友諒圍洪都召還會師伐漢過於彭蠡之康郎山漢軍舟大槩上流鋒銳甚遇春偕諸將大戰呼聲動天地無不一當百友諒驍將張定邊直犯太祖舟舟膠於淺幾殆遇春射中定邊太祖舟得脫而遇春舟復膠於淺有敗舟順流下觸遇春舟乃脫轉戰三日縱火焚漢舟湖水皆赤友諒不敢復戰諸將以漢軍尚強欲縱之

去遇春獨無言比出湖口諸將欲放舟東下太祖命扼上流遇春乃溯江而上諸將從之友諒窮蹙以百艘突圍諸將邀擊之漢軍遂大潰友諒死師還第功最賚金帛土田甚厚從圍武昌太祖還應天留遇春督軍困之明年太祖即吳王位進遇春平章政事太祖復視師武昌漢丞相張必先自岳來援遇春乘其未集急擊禽之城中由是氣奪陳理遂降盡取荆湖地從左相國達取廬州別將兵略定臨江之沙坑麻嶺牛陂諸寨禽偽知

州鄧克明遂下吉安圍贛州熊天瑞固守不下太祖使使諭遇春克城無多殺苟得地無民何益於是遇春浚壕立柵以困之頓兵六月天瑞力盡乃降遇春果不殺太祖大喜賜書褒勉遇春遂因兵威諭降南雄韶州還定安陸襄陽復從徐達克泰州敗士誠援兵督水軍壁海安壩以遏之其秋拜副將軍伐吳敗吳軍於太湖於毗山於三里橋遂薄湖州士誠遣兵來援屯於舊館出大軍後遇春將奇兵由大舍港營東阡更出其後敵出

精卒搏戰奪擊破之襲其右丞徐義於平望盡燔其赤龍船復敗之於烏鎮遂北至昇山破其水陸寨悉俘舊館兵湖州遂下進圍平江軍虎邱士誠潛師趨遇春遇春與戰北濠破之幾獲士誠久之諸將破葑門遇春亦破閭門以入吳平進中書平章軍國重事封鄂國公復拜副將軍與大將軍達帥兵北征帝親諭曰當百萬衆摧鋒陷堅莫如副將軍不慮不能戰慮輕戰耳身為大將顧好與小校角甚非所望也遇春拜謝既行以遇春

兼太子少保從下山東諸郡取汴梁進攻河南元兵五萬陳洛水北遇春單騎突其陣敵二十餘騎攢槊刺之遇春一矢殪其前鋒大呼馳入麾下壯士從之敵大潰追奔五十餘里降梁王阿掄河南郡邑以次皆下謁帝於汴梁遂與大將軍下河北諸郡先驅取德州將舟師並河而進破元兵於河西務克通州遂入元都別下保定河間真定與大將軍攻太原庫庫特穆爾來援遇春言於達曰我騎兵雖集步卒未至驟與戰必多殺傷夜



劫之可得志達曰善會庫庫部將呼必瑪勒來約降請  
為內應乃選精騎夜銜枚往襲庫庫方燃燭治軍書倉  
卒不知所出跌一足乘驪馬以十八騎走大同呼必瑪  
勒降得甲士四萬遂克太原遇春追庫庫至忻州還詔  
改遇春左副將軍居右副將軍馮勝上北取大同轉徇  
河東下奉元路與勝軍合西拔鳳翔會元將伊蘇攻通  
州詔遇春還備以平章李文忠副之帥步騎九萬發北  
平徑會州敗敵將汪文清於錦州敗伊蘇於金寧進取

大興州分千騎為八伏守將夜遁盡禽之遂拔開平元  
帝北走追奔數百里獲其宗王齊克慎平章鼎住等將  
士萬人車萬輛馬三千匹牛五萬頭子女寶貨稱是師  
還次柳河川暴疾卒年僅四十太祖聞之大震悼喪至  
龍江親出奠命禮官議天子為大臣發哀禮議上用宋  
太宗喪韓王趙普故事制曰可賜葬鍾山原給明器九  
十事納墓中贈翊運推誠宣德靖遠功臣開府儀同三  
司上柱國太保中書右丞相追封開平王謚忠武配享

太廟肖像功臣廟位皆第二遇春沈鷺果敢善撫士卒  
推鋒陷陣未嘗敗北雖不習書史用兵輒與古合長於  
大將軍達二歲數從征伐聽約束惟謹一時名將稱徐  
常遇春嘗自言能將十萬衆橫行天下軍中又稱常十  
萬云遇春從弟榮積功為指揮同知從李文忠出塞戰  
死臚胸河遇春二子茂昇茂以遇春功封鄭國公食祿  
二千石予世券驕穉不習事洪武二十年命從大將軍  
馮勝征納克楚於金山勝茂婦翁也茂多不奉勝約束

勝數誚責之茂應之慢勝益怒未有以發也會納克楚請降詣右副將軍藍玉營酒次與玉相失納克楚取酒澆地顧其下咄咄語茂方在坐麾下趙指揮者解蒙古語密告茂納克楚將遁矣茂因出不意直前搏之納克楚大驚起欲就馬茂拔刀砍其臂傷納克楚所部聞之有驚潰者勝故怒茂增飾其狀奏茂激變遂械繫至京茂亦言勝諸不法事帝收勝總兵印而安置茂於龍州二十四年卒初龍州土官趙貼堅死從子宗壽當襲貼

堅妻黃以愛女子茂為小妻擅州事茂既死黃與宗壽爭州印相告訐或構蜚語謂茂實不死宗壽知狀帝怒責令獻茂自贖命楊文韓觀出師討龍州已而知茂果死宗壽亦輸款乃罷兵茂無子弟昇改封開國公數出練軍加太子太保昇之沒實錄不載其他書紀傳謂建文末昇及魏國公輝祖力戰浦子口死於永樂初或謂昇洪武中坐藍玉黨有告其聚兵三山者誅死常氏為興宗外戚建文時恩禮宜厚事遭革除無可考其死亦

遂傳聞異詞昇子繼祖永樂元年遷雲南之臨安衛時  
甫七歲繼祖子寧寧子復弘治五年詔曰太廟配享諸  
功臣其贈王者皆佐皇祖平定天下有大功而子孫或  
不沾寸祿淪於氓隸朕不忍所司可求其世嫡量授一  
官奉先祿乃自雲南召復授南京錦衣衛世指揮使嘉  
靖十一年紹封四王後封復孫元振為懷遠侯傳至曾  
孫延齡有賢行崇禎十六年全楚淪陷延齡請統京兵  
赴九江協守又言江都有地名常家沙族丁數千皆其

始祖遠裔請鼓以忠義練為親兵帝嘉之不果行南都  
諸勲戚多恣睢自肆獨延齡以守職稱國亡身自灌園  
蕭然布衣終老

贊曰明太祖奮自滁陽戡定四方雖曰天授蓋二王之  
力多焉中山持重有謀功高不伐自古名世之佐無以  
過之開平摧鋒陷陣所向必克智勇不在中山下而公  
忠謙遜善持其功名允為元勲之冠身依日月剖符錫  
土若二王者可謂極盛矣顧中山賞延後裔世叨榮寵

而開平天不假年子孫亦復衰替貴匹勲齊而食報或  
爽其故何也太祖嘗語諸將曰為將不妄殺人豈惟國  
家之利爾子孫實受其福信哉可為為將帥者鑒矣



明史卷一百二十五

欽定四庫全書

明史卷一百二十五考證

徐達傳尋從破元兵於滁州 臣方焯謹按太祖紀云

夜襲元將張知院於橫澗山又云攻滁州下之此傳作徐達從破元兵於滁州澗江合兩事為一疑有脫

訛附識

徐達傳繼克寧國 臣方焯按明太祖紀書至正十七

年四月丁卯自將克寧國取之而傳以克寧國為徐


達事不似太祖自將而達從之書法與紀互異

徐達傳郭子興軍婁門

臣方煒按興一名子興封鞏

昌侯非滁陽王郭子興也謹附識

明史卷一百二十五考證



總校官編修臣吳紹濂